

## VAUGHAN (TEULU), Corsygedol, plwyf Llanddwywe, Sir Feirionnydd.

Rhoddir ach y teulu hwn, a fu'n bur enwog yn hanes Cymru, gan [Lewys Dwnn](#), dirprwy-heroddr, a chan achyddwyr eraill. Fel rheol dechreu'r tabl achau gydag uniad [Osbrwn Wyddel](#) â merch ac aeres hen deulu Cymreig Corsygedol; yr oedd y ferch hon yn ward [Llywelyn Fawr](#). Pan ymwelodd [Dwnn](#) â Chorsygedol yn 1588, GRIFFITH VAUGHAN, a oedd yn siryf Meirionnydd y flwyddyn honno, oedd pen y teulu. Ail-adeiladodd Griffith Vaughan Corsygedol yn 1592/3, ac adeiladodd 'Gapel Corsygedol' yn rhan o eglwys Llanddwywe; bu farw 9 Tachwedd 1616 a chladdwyd ef yn eglwys Llanddwywe. Bu GRIFFITH VAUGHAN cynharach nag ef yn amddiffyn castell Harlech gyda [Dafydd ab Ieuan ab Einion](#), ei gefnder, yn erbyn plaid teulu York; dywedir mai'r Griffith Vaughan hwn a adeiladodd 'Y Ty Gwyn yn Bermo' er mwyn hwyluso cyfathrach dros y môr (rhwng Sir Feirionnydd a Sir Benfro) â [Siaspar Tudur, iarll Pembroke](#), ewythr [Henry o Richmond](#) (y [brenin Harri VII](#) wedi hynny), pan oeddid yn paratoi ar gyfer goresgyn Prydain (cyn brwydr Bosworth, 1485); ar hyn gweler E. Rosalie Jones, *Hist. of Barmouth*, a hefyd 'Cywydd moliant Gruffydd Vychan ap Gruffydd ab Einion o Gorsygedol, rhyfelwr gyda'r brenin Harri VII' gan [Tudur Penllyn](#). Dywed [Robert Vaughan](#), Hengwrt, i [Siaspar Tudur](#) fod yn aros yng Nghorsygedol ac ychwanega i [Henry Richmond](#) ei hunan fod yn aros yno hefyd, 'as some say.' Gwraig y Griffith Vaughan hwn oedd Lowri, nith i [Owain Glyndwr](#).

Dyma ach Griffith Vaughan (1588) yn ôl [Dwnn](#): Griffith ap Richard ap Rhys ap William ap Griffith, 'sgweier o gorff [Henry VII](#)' a thrydydd mab Griffith ab Einion ap Griffith ap Llewelyn ap Cynwrig ab Osbrwn Wyddel. Ceir y disgyniadau o 1588 ymlaen mewn llyfrau a llawysgrifau achau: e.e. gan [J. E. Griffith](#), *Pedigrees*, 279. Ceir yn *Archæologia Cambrensis*, VI, ii, 1-16, olwg gyffredinol ar hanes y teulu gan [W. W. E. Wynne](#), Peniarth, wedi ei seilio (gyda nodiadau gwerthfawr) ar gopi gan [Angharad Llwyd](#) o lawysgrif a ysgrifennwyd yn 1770 gan William Vaughan, 'penllywydd' y Cymmrodorion (isod). Fel y dengys [Edward Breese](#) (*Kalendars of Gwynedd*), bu llawer o'r Fychaniaid yn uchel siryfion (Sir Feirionnydd a Sir Gaernarfon), yn aelodau seneddol, ac yn 'Custodes Rotulorum.' Daeth RICHARD VAUGHAN yn gwnstabl castell Harlech ym mis Gorffennaf 1704; hanner canrif yn ddiweddarach dewiswyd ei nai ef, EVAN LLOYD VAUGHAN (bu farw 1791), i'r un swydd.

Yr oedd WILLIAM VAUGHAN (bu farw 1633) yn siryf Sir Gaernarfon yn 1613 a 1632; ailadeiladodd ef Plas Hên, Llanystumdwy, 1607, ac adeiladodd y gatws yng Nghorsygedol yn 1630. Yr oedd yn gyfaill i Ben Jonson, y bardd, a anfonodd gopi o'i weithiau argraffedig yn rhodd iddo, a cheir llythyr oddi wrth Vaughan at [James Howell](#) yn *Epistolae Ho-Eliaenae*. Mab iddo ef oedd RICHARD VAUGHAN (bu farw 1636), yr aelod seneddol dros Feirionnydd a ddaeth mor adnabyddus yn Llundain oblegid ei fod mor eithriadol o dew. Priododd Richard Vaughan Anne, ferch ([Syr](#)) [John Owen](#), Clenennau. Priododd WILLIAM VAUGHAN (bu farw 1669), ei fab yntau, Anne, ferch teulu [Nannau](#), uniad rhwng dau deulu yr oedd eisoes gryn gyfathrach rhyngddynt. Bu farw eu mab hynaf hwy, GRIFFITH VAUGHAN, yn 1697 heb etifedd; eithr cadwyd y llinach ymlaen ym mherson ei frawd RICHARD VAUGHAN (bu farw 1734). Trwy ei wraig Margaret, merch [Syr Evan Lloyd](#), Bodidris, sir Ddinbych, daeth Richard Vaughan yn dad WILLIAM VAUGHAN (1707 - 1775; isod). Daeth ei wraig ef, Catherine ferch [Hugh Nanney](#), yn unig etifeddes Nannau maes o law. Unig blentyn William Vaughan ac Anne (Nanney) oedd ANN VAUGHAN, a briododd David Jones Gwynne, Taliaris, Sir Gaerfyrddin. Ann oedd yr aeres olaf yn y llinell uniongyrchol; bu hithau farw 16 Mawrth 1758, heb etifedd. Cynrychiolydd gwrywol diwethaf y teulu oedd EVAN LLOYD VAUGHAN, brawd William Vaughan, ac aelod seneddol dros Feirionnydd. Pan fu ef farw, ar 4 Rhagfyr 1791, aeth Corsygedol a'r stadau a oedd yn gysylltiedig â hi yn eiddo ei nith, Margaret, gwraig [Syr Roger Mostyn, barwnig](#).

Yn ystod y canrifoedd bu aelodau o'r teulu yn noddwyr llenyddiaeth Gymraeg a cheid croeso yng Nghorsygedol i feirdd yn clera; gweler Mostyn MS. 165. Fel y gellid disgwyl canwyd llawer i'r teulu gan y beirdd a adnabyddir wrth yr enw 'Phylipiaid [Ardudwy](#)'. Yr oedd eu cartrefi hwynt yn weddol agos i Gorsygedol. Canodd [Siôn Phylip](#) (bu farw 1620) tuag 16 o gywyddau, etc., i'r teulu; canodd [Gruffydd Phylip](#) (bu farw 1666), mab [Siôn Phylip](#) a 'bardd teulu' Corsygedol, tua 19; canodd [Phylip Siôn Phylip](#) (bu farw c. 1677), mab arall i [Siôn Phylip](#), un cywydd. Y bardd a oedd yn byw agosaf at Gorsygedol ydoedd [William Phylip](#), Hendrefechan (bu farw Chwefror 1670); bu ef yn helpu Siôn Bryncir i ysgrifennu 'Cywydd cyngor' i nai hwnnw, sef i William Vaughan. Y mae i un cywydd gan [Gruffydd Phylip](#) bennawd diddorol - 'I Wmffire Davies o Landyfyrdog y Mon dros Rich: V n o Gorsygedol i ofyn 100 o gywydde D[afydd] ap G[wilym]'. Gwyddys bod rhai o'r Fychaniaid yn casglu llawysgrifau a llyfrau. Pan ddaeth llawysgrifau Cymraeg Plas Mostyn (Sir y Fflint) i Lyfrgell Genedlaethol Cymru yn 1918 yr oedd yn eu mys 10 (os nad 11) o gyfrolau a fuasai gynt yng Nghorsygedol, sef Mostyn MSS. 115, 130, 131, 144 ('Llyfr Coch Nannau'), 145 ('Llyfr Gwyn Corsygedol'), 147, 160, 162, 163 ('Y Llyfr Gwyrdd'), 164, a 165 (y llawysgrif hon yn bwysig o safbwynt hanes y teulu). Cadwyd y traddodiad llenyddol ymlaen yn gryf gan William Vaughan (1707 - 1775), aelod seneddol dros sir Feirionnydd o 1734 hyd 1768, arglwydd-raglaw a 'Custos Rotulorum' y sir honno, a 'Phenllywydd' cyntaf Anrhydeddus Gymdeithas y Cymmrodorion. Cawsai ei addysg mewn ysgolion yng Nghaer a Llundain ac yng Ngholeg S. Ioan, Caergrawnt. Pan gyhoeddodd [Huw Jones](#) (o Langwm) ei [Diddanwch teuluaidd](#) yn Llundain yn 1763, i William Vaughan y cyflwynodd y gwaith. Ceir hefyd lawer o gyfeiriadau at Vaughan yn llythrau [Morysiaid](#) Môn. Yn dilyn yn union yn y *Diddanwch ...* ar ôl 'Caniad y Gog i Feirionnydd,' cân adnabyddus [Lewis Morris](#), ceir trosiad Saesneg o waith William Vaughan. Argraffwyd apêl Gymraeg Vaughan at etholwyr Meirionnydd yn etholiad 1747 gan [Edward Breese](#) yn ei *Kalendars of Gwynedd*.

## Awdur

Syr William Llewelyn Davies, (1887 - 1952)

## Ffynonellau

*Heraldic Visitations of Wales and Part of the Marches between the years 1586 and 1613, under the authority of Clarencieux and Norroy, two kings at arms* (Llandovery 1846), ii, 218-9

E. Breese, *Kalendars of Gwynedd ...* (1873)

J. H. Davies (gol.), *The Letters of Lewis, Richard, William, and John Morris, of Anglesey, (Morrisiaid Môn) 1728-1765* (1907-9)

G. J. Williams, *Llythyrau at Ddafydd Jones o Drefriw*

J. E. Griffith, *Pedigrees of Anglesey and Carnarvonshire Families* (1914)

W. Ll. Davies, 'Phylipiaid Ardudwy,' yn *Y Cymmrodor*, xl

*Llawysgrif Mostyn yn Llyfrgell Genedlaethol Cymru, Aberystwyth* 165

*Llawysgrif Peniarth yn Llyfrgell Genedlaethol Cymru* 254

*Reports of the Historical Manuscripts Commission, R.W.M., I, i*

*Archaeologia Cambrensis, IV, vi, 1-16*

*Y Cymmrodor*, 1951, 53-6 (a darlun)

## Further reading

Coflein: [Cors-y-Gedol Hall](#)

Coflein: [Cors-y-Gedol gatehouse](#)

The History of Parliament: [VAUGHAN, Richard II \(c.1665-1734\), of Cors-y-Gedol, Merion.](#)

The History of Parliament: [VAUGHAN, Richard \(c.1665-1734\), of Corsygedol, Merion.](#)

Wikipedia Article: [Richard Vaughan \(Corsygedol\)](#)

## Dolenni Ychwanegol

Wikidata: [Q20748887](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

